

Ekalesia Fa'apopotoga Kerisiano i Amerika Samoa

Lotu Talosaga 2020

Ianuari 2 - 4

Aso Tofi – Aso Toonai



Sini o lenei Vaiaso Tatalo:

**“Silasila Toto’a i Suiga:
Toe Taga’i i Fa’atinoga ua Masani ai”**

Upu Tomua

O le Fuifui lotu e mānatua ai le alofa o le Atua, fa'apea le mānatua o i latou ua fai i lagi le faigamalaga, o ē na tausoa ma mulumulu fa'atasi i taimi manuia fa'apea taimi o puapuaga, i le tamaoaiga fa'apea le mativa, o le upega mau ma le upega ua motumotu peita'i, o le tapuaiga e le uma le fa'ane'etaga ma ta'uta'u atu le Atua alofa ma le agalelei i mea e tele na ia faia, fa'apea ai le valaau atu i lona alofa ina ia fa'aauau i lenei tausaga.. O le mea lea, ina omai ia, seia o tatou avatu mea i matautusa, ma molimoli o laau i fogaa, i le Atua e onomea ma tataua i ai o viiga ma le fa'ane'etaga e fa'avavau lava.

O le manulauti i lenei vaiaso atoa, ua fa'apea mai, **'Silasila toto'a i suiga – toe taga'i i fa'atinoga ua masani ai.'**

E toe manatua le fa'aliliuga matagofie o le Tusi Paia, le tala i le fasia o Koliata le toa o Filisitia e Tavita, o le tala ina ia silasila toto'a i suiga - ma toe taga'i i ai i fa'atinoga.

O le tala i leoleo mamoe na fasia le toa ta'uta'ua, o le pelu ma le tao leoleo a le toa, ma le ma'atā na fasia ai le toa; o le toa e le faiaina ma le malomaloā o lona gutu, ma le leoleo mamoe na te valaau mai e le o le pelu poo le tao leoleo ae fa'atino i le manumalo o lona Atua; O le toa e mautū ana mea tau, o le polou, o le ufi fatafata, o ona lima ma ona vae e malutia ai o ia i le feagai ma le fili, ma le leoleo mamoe na o le fatafata ma le ma'atā ma le suafa o lona Atua e manumalo ai. Fai mai le fa'aliliuga a se tasi uso, e le'i liai'a e Tavita le ma'a mai le ma'atā ina ia pātonu le ma'a i le ulu o Koliata, a e na mātua liliu ma fa'aa'ai lelei ona vae, ma sagatonu lana va'aia i le ava o le pulou o Koliata, e sao atu ai le ma'a i le muaulu. O le fa'aliliuga lea a lea tagata ua fa'ateteleina ai le tamāoa'iga o lenei tala, e fiafia e faitau pea.

O le a sau tala tāua e te fia fa'ailoa i lenei tausaga foi?

O tatou o Kerisiano, e masani ona ta'ua i tatou o "Tagata o le Upu;" o le Upu a le Alii e iloa ai le ala tonu ma le sa'o e savavali ai ma Keriso ma lona fa'atasi mai. O le Upu sili lea ua tatou faitau i ai ia Tavita, ina aveva ma ta'iala e ta'ita'iina ai la tatou faigamalaga: "Silasila totoa i suiga – toe tagai i fa'atinoga ua masani ai," i lenei tausaga fou.

O lenei vaitau ua mautinoa o loo afaina le lalolagi ma le foafoaga atoa: o ave malosi e mamau ai le fogatai o le lalolagi lea ua tatou iloa i le tafia mai o le aisa i matū ma sauté, lea ua o'oo'o le tai, ma fa'apea ona goto atu o tatou motu, e fa'apea fo'i le fēte'enai o tagata ma o latou ta'ita'i. O se vaaiga matautia i o tatou vaitaimi, ma e le nofo lelei le Kerisiano ae saili i suiga ma fa'atinoga lelei, ae maise le tatalo tuuina atu i le Atua ina e fa'asino mai o ala talafeagai e fa'aauau ai mea na e faia mo le tagata. O le ā se upu taua ua e manatu i ai e fa'amatalaina i lenei aso?

Ia manuia le Fuifui Lotu a le Ekalesia i le amataga o lenei Tausaga Fou!

Aso Tofi – Ianuari 2, 2020

Autu – ‘O le Ala e Ola ai’ (*The Path of Life*)

Tusi Faitau – Salamo 23

Matua – f.4: *‘E ui lava ina ou savali i le vanu o le ata o le oti, ou te le fefe lava i se mea leaga; auā o oe ta te fa’atasi ma a’u; o lau laau ma lou tootoo e fa’amafanafanaina ai a’u...’*

O nai ta’iala e saunia ai oe mo lau lauga:

1. O le Salamo 23, o le pese a le leoleo mamoe lelei na te fafaga i ana mamoe i mea o i ai le vao mu’a, na te toe si’itia lana lafu i fanua e maua ai le vao.
2. A oo ina mūgālā ma le maua se vao ma se vai mo mamoe, ona manatua lea o upu e pei ona maua i le Salamo 63:1: *“Le Atua e... ou te saili ia te oe, ua fia inu lou agaga ia te oe, ua ou matuā naunau atu ia te oe i le nuu naumati, e lailoa ai, e leai ni vai.”*
3. O iinei tonu e atagia ai le ala o le leoleo mamoe: na te iloa ana mamoe, e silasila ma opogi, e tula’i ma saili, e fa’alagolago i ai ana mamoe, o le to’oto’o ua i ai le pule e fa’atino ai o feau ma galuega. Ua atagia ai iinei le ala o Keriso le leoleo mamoe sili.
4. E tele luko ma manu feai e osofa’ia ai mamoe, fa’apea foi o auala e fa’avaatu’ia ai le savaliga a mamoe i luga o le ala. Peita’i, ua iloa e le leoleo mamoe o ala e leoleoina ai lana lafu, fa’apea le tali atu i o latou mana’o ma mea ua moomia.
5. O le a se lu’i mo i tatou i nei va’aiga ua fa’ailoa mai?
6. O le vaitau o manatu ma lagona, fa’apea ai le fa’alagolago o le tagata i lona iloa ma lona tamā’o’aiga. O le a se va’aiga a le Leoleo mamoe i le o’o mai o suiga faigatā?
7. O le fa’aogāina o le upu leoleo mamoe, e le o fa’atatau i se leoleo mamoe e to’atasi, a o le upu e fa’atatau i tagata uma; o i tatou uma o leoleo mamoe lelei.
8. O le fa’amanatu, ia toe va’ava’ai i lo tatou Atua ma Iesu Keriso, ma lona fa’ailoa mai, o ia o le leoleo mamoe lelei, na te iloa mea silisili ma fusia i tatou i lona alofa silisili ese; o le alofa e le sili atu i se isi alofa; o ia ua faia le togiola e manuia ai i tatou uma ma mafuta ma ia i le ola e fa’avavau.

9. I le solosolo lelei fa'apea le o'o mai o puapuaga; o le fa'aeaina ma le mativa; o le saolotoga fa'apea le olaga fa'apologaina; o ala tonu ia ua fa'ailoa mai e Tavita, *'Le Alii e, ou te ala saili ia te oe.'*
10. Ua na o se fa'ama'ite, a o ala o le olaga nei, e fa'aosofia ai le loto o le tagata na te fa'ailoa le fetalai mai o le Alii.

TALOSAGA

Fa'afetai:


Fa'afetai Le Alii e, ona ua aulia mai o lenei tausaga fou ma le manuia i lou alofa ma le agaga lelei. O lau Tusi Paia ua fa'ailoa mai ai o galuega na e faia, o lou Agaga e taitaia i matou i ala tonu uma, atoa ma le Togiola ua faia e Keriso Iesu e magalo ai i matou, ma mafuta fa'atasi ma lau afio i le ola e fa'avavau.

Fa'ato'esega:

Le Alii e, ua e silafia o ala uma ua matou uia, i le alafai ma le taoto atu, i le tautala ma fa'atinoga, o mafaufauga i o matou loto, o le vaai o matou mata ma le tagotago o o matou lima, o le soifua auunaga ua valaauina i ai, Le Alii e, ua matou tautino atu o i matou o ni auunaga ua le tusa lau silafaga. O lea ua matou valaau atu i le loto salamo ma le fa'amaoni, seia e fa'amagalo i matou i le toto taua o Keriso Iesu.

Mana'oga:

Se'ia e foai mai le fa'atuatua, le talitonu, o Oe lava le Leoleo mamoe sili na te fusia i matou na tali mai o mea ua valaau atu ai, Ia matou iloa o Oe o le pule i mea uma na e faia. Seia e foa'i mai ina avea i matou ma molimau e fa'ailoa o lou alofa i soo se tagata ua fia maua o se fesoasoani, Amene.



Aso Faraile – Ianuari 3, 2020

Autu – “Taimi o fiafiaga” (Party time)

Tusi Faitau – Luka 15:11-32

Matua – ff.31b-32 “... *Ta e, ta te nonofo pea ma ‘oe, o a’u mea uma foi, o au ia. Ua tatau foi ona tatou fiafia ma olioli, auā o lou uso lē nā na oti, a ua toe ola mai; na lē iloa foi, a ua maua.*”

O nai ta’iala e saunia ai oe mo lau lauga:

E tele ni mafaufauga tāua fa’ale-agaga o loo aumaia i lenei matua:

- Nonofo fa’atasi ma fiafia i mea lelei e maua i le aiga
- Fetufaa’i fa’atasi
- Fiafia ma olioli fa’atasi ona o mea tāua ua maua, ma mea lelei ua fa’aopoopo mai pea
- O aiga sa tete’a a ua toe fuifui fa’atasi, e maua ai le fiafiaga e malie ai le loto

O le mata’upu autū o lenei vaiaso: **“Silasila toto’a i suiga: toe taga’i i fa’atinoga ua masani ai.”** O le fesili: Poo i ai ni suiga, a e poo i ai foi ni fa’atinoga ua masani ai, i lenei fa’ata’oto a le Alii o Iesu?

- Muamua: O le atalii na ia faia le mea ua loto i ai, a e lē o le mana’oga lea o lona tamā. O le suiga iloga ua aliali mai i lenei fa’ata’oto: ua lē tauia ma sui e le tamā le manatu fa’apito sa i lona atalii ina ua faia le mea ua loto i ai.
- Lua: Na manatu le atalii, ai o le a tele nisi tamāoaiga e fa’aopoopo i mea ua ia te ia, e ala i le faia o lona lava loto, ae peitai, ua na o le mativa ma le fa’alumaina na ia maua ai---o le tau i le loto tu’inanau i le ‘oa fa’ale-lalolagi.

Ua aliali mai i lenei fa’ataoto, e tele suiga o mea ua molimauina, nai lo mea sa mua’i mafaufauina. Ma o ia suiga uma, o le avanoa tu’u sa’o lenei e aga’i atu ai i le fiafiaga matagofie e maua ona o le loto talitonu ma fa’atuatua i le alofa fua mai o le Alii le Atua. O le fa’amagaloina, o le fa’aolaina lava lea. Ae o le taliaina o le agaga i le ola fa’avavau, o le fiafiaga sili lea e naunau i ai so’o se Kerisiano fa’amaoni.

Le Ekalesia e, ma le ‘au fai talosaga o lenei Tausaga Fou 2020, ia tatou fiafia ma olioli auā ua toe soifua mai Keriso Iesu nai le oti ma le tu’ugamau. O le fiafiaga lea e gata mai ai fiafiaga uma i le lalolagi ma le lagi i lugā. Ona o Keriso Iesu: “Ia Manuia le Tausaga Fou!” AMENE.

TALOSAGA

Fa’afetai:

Ia tatou fa’afetai i le Atua ona e lē o tauai ma sui mai i le faia pea o tatou loto, a e lē o lona finagalo lea. Fa’afetai ona o lona alofa fua mai, e ui lava ina tatou faia uiga ma amioga o le loto tu’inanau ma le agasala. Fa’afetai ona o Iesu Keriso, lona Alo Pele e to’atasi, ua fai ma o tatou fa’afiafiaga sili e ala i le fa’aolataga na ia saunia ua tatou olioli ma fiafia ai---o le ola lea e fa’avavau fa’atasi ma le Alii le Atua i lona Nofaalii.

Fa’ato’esega:

Ua fa’atusaina i tatou i le atalii fa’amaumau ‘oa, auā ua faia pea mea ua tatou loto i ai. Le Alii e, ia e fa’amagalo mai ia te i matou. Ua mavae atu le na tausaga tuai, sa tele ina tatou fa’ama’imauiina mea lelei ma le taua e tusa ma le finagalo alofa o le Atua Soifua. Le Alii e, fa’amagalo mai i matou. Ia fa’atupu se loto fou, se loto lelei ia te i matou. Le Tamā alofa e, ua matou sesē i ou luma!

Mana’oga:

Ia avea lenei tausaga fou 2020, ma tausaga matou te mulimuli tonu ai i le fa’afiafiaga sili fa’atasi ma lau Afio, Iesu Keriso, le Fa’aola o le lalolagi uma. Ia matou maua le loto fuatiaifo e lelei, e faia ai le filifiliga amiotonu e fa’atino ai le fa’afiafiaga moni i o matou loto. Ia matou fiafia e fa’atino ni suiga lelei ma le matagofie e te fia silasila mai i ai. Ia e ta’ita’iina i matou i le ala e tau atu i le fa’afiafiaga sili---o le ola ua fa’amagaloina ma talia le fa’aolataga na saunia e Iesu Keriso: O le ola lava lea e fa’avavau, fa’avavau lava. AMENE.

Aso Toonai – Ianuari 4, 2020

Autu – “O le ‘ele’ele e taoto ai le tali” (*The answer lies in the soil*)

Tusi Faitau – Mareko 4:1-20

Matua – ff. 20: *“A’o i latou na luluina i le ele’ele lelei, o i latou ia ē ua fa’alogo i le upu, ma latou talia, ma fua mai e ta’itolugafulu i nisi, e ta’iono sefulu i nisi, e ta’iselau fo’i nisi.”*

O mafaufauga fa’aleagaga e ta’iala ai oe mo lau lauga:

Mo aiga e fa’amoemoe lo latou tamāoaiga i le lau’elelee, o le mitamitaga sili i le tamā o le aiga: o lana fa’atoaga. E alu ai lona taimi ma lona malosi e galuea’iina, ina ia maua ai le tamāoaiga e manuia ma ola lelei ai lona aiga. O le tinā foi, o loo i ai le mea’alofa ma le taleni e totō ai le fa’atoaga. Poo le vaitau o le susulu o le La poo le to’ulu o timuga, o le fa’atoaga pe a lelei ona fai, na te aumaia le mea’alofa o le ola i totonu o soo se aiga e ala i mea taumafa.

Peita’i, e pei ona silafia e i latou e masani i le faiva o le fai fa’atoaga, o lenei atina’e e le o se mea faigofie. Ina ia fua lelei le fa’atoaga, e mana’omia ona saunia muamua le elelee. E mana’omia ona fa’amamā lelei; auau ese ma’a ma mea e le aogā, ina ia faigofie ai le galuega o le sua-tosina o le palapala. O galuega tomua ia o le fa’atoaga a lelei ona tapena i le amataga, o le a fa’apena foi ona manuia le seleselega i se taimi o i le lumanai.

E fa’apea fo’i se ata e mafai ona tatou va’ava’ai ai i le ola fa’aleagaga o le tagata. E mana’omia ona tapena lelei o tatou loto – o le elelee lea – ina ia tupu ma ola ai le **Upu** a le Atua i le soifua o le tagata. Auā a lelei ona tapena le loto, o le a fa’apena ona fua tele mai le Upu a le Atua i le soifua o le tagata, e ala i fa’amanuiaga e tele o le a maua. Ae a le lelei le tapenaga, o le Upu lava lea a le Atua e toe fa’amasinoina ai le tagata.

Ia auau ese ni ma’a tui ma ni ma’a gao o loo fai ma gaogaosā i o tatou loto, auā la tatou faigamalaga i lenei Tausaga Fou. Tatou tutū fa’atasi ma pulupululima fa’atasi e suatosina o tatou loto, ina ia mafai ona ola le **Upu** a le Atua ma fuatele mai i o tatou olaga. Tatou omai fa’atasi i le agaga o le tatalo ma le ola ofoina atu mo le Atua; mafuta faatasi ma galulue fa’atasi; auā a o’o mai le seleselega, ona tatou selesele lea ma le fiafia i manuia o le ola ua foa’iina mai e le Atua mo i tatou, e fai ma oso lelei mo lenei Tausaga Fou.

TALOSAGA

Fa'afetai:

Tatou fa'afetai i le Atua ina ua tatou aulia mai le aso 4 o lenei tausaga fou. Tatou fa'afetai i le Atua ona o lona tamaoiga liligi mai, ua tatou fa'asoaina i le aso ma lea aso. Tatou fa'afetai foi ona o Lana Upu ua fai ma ta'iala mo i tatou auā lo tatou ola tautua mo lona finagalo.

Fa'ato'esega:

Fa'atoese i le Atua ona ua le mafai ona tatou tausisi i Lana Upu, ua fai pea i tatou ma ma'a e fa'alavelave i lona finagalo fa'aailoa e ala i a tatou uiga ma amio. Fa'atoese ona ua leai se fa'amaoni e ala i lo matou soifua ofoina e galulue mo lou finagalo. Ua le mafai ona matou fa'atupuina lau upu ona ua matou ola muimui ma fesiligia lou alofa.

Mana'oga:

Fa'amanuia lau afio i le folauga a lau fanau ua amatalia i lenei tausaga fou ua matou aulia. Ia matou iloa ona tutu fa'atasi e galulue mo lou finagalo ina ia ola. Alofagia e lau afio nai a matou fanau, ina ia iloa ona ola mo lou finagalo. Tapenaina e lau Afio o latou olaga, ina ia ta'uaogaina mo lou finagalo fa'aailoa. Talosia tama fanau o lou atunu'u o salalau i itu e fia o le lalolagi, i so'o se faiva ua latou galulue ma punonou ai. Alofa lau Afio ma fa'amanuia ia te i latou uma. Le gata i lea o alo ma fanau i la latou auaunaga i vaega 'au a le malo tele o Amerika, ia i ai le filemu o lau Afio ia te i latou uma. AMENE.



**IA MANUIA LAU FAIGAMALAGA EFKAS
I LENEI TAUSAGA FOU 2020!**